

682.8213

0821

:111

豫河續志

陳善同題

卷一



豫河續志

信陽陳善同題

豫河續志序

明清兩代治河者類以南河爲運道所關遂皆詳於南河而畧於豫河實則豫省正當黃河腹部地勢平坦土質疏鬆濱決易而防塞難其重要固遠出南河之上也試觀有清一代黃河決口凡三十九次而豫境竟有二十四次之多非其明証也歟自咸同以降南河絕流豫河乃漸爲世所注意然特著專書以研究之者迄無其人至前河南河務局吳詠湘局長所編豫河志書成始推專究豫河之鼻祖焉惜書中記

事終於清末民國以後仍付闕如現局長信陽陳君
雨人鑑於時代之要求爰議修續志以補前志所未
備自十三年春着手編纂至十四年冬全書告成歷
時二載甫克蕺事其非率爾操觚也可知余獲讀一
周覺其體例之精審分類之詳明考証之確實搜羅
之宏富綱舉目張無美不備洵足與前志相發明而
彌縫其闕陷矣夫猶是河也西人稱爲福海中國視
爲禍源其故何哉不過言河之書未臻美善治河之
法尙欠精良而已是書旣成世之留心河務者果使

人手一編神明而變化之則河之害可減而利可興
微特豫省之福抑亦國家之幸也余魯人也而產地
接壤利害共同且曾駐防豫省多年頗知民間疾苦
今復忝握軍符於是邦真有第二故鄉之感茲幸豫
人之獲有治河專書并能賡續前志俾成全璧也故
喜而序其梗概如此

中華民國十五年八月寇英傑撰

豫河續志序

黃河之源逾數千里經隴陝諸省始入豫境豫之西則山脉宛延束水就範起伏有常數千年來迄無河患豫之東則瀕近於海易於導洩故漫溢多而潰決少豫省地居腹心三門而下水勢驟闊土薄沙散臨河城郭或低於河一經潰決爲患甚鉅不得已而以兩岸隄防約其勢緩其衝而維護之然自周秦以後河決次數已指不勝屈卽清代二百餘年間已決至二十餘次之多昔人有言欲疏下流必策上源治河

無一勞永逸之功有補偏救弊之法不可有喜新炫
奇之智惟當守安常處順之庥故往昔治河重在疏
濬近代治河重在修防河道之移徙變遷因革繫焉
驗之成績以制其宜度其形勢以順其性準今酌古
惟簡冊之是資自禹貢河渠諸志而外專家所述如
全河備要河防一覽行水金鑑河防志畧治河方畧
以及言河籌河等篇幾至盈几充棟而豫河獨無專
書豈足以資考鏡而策萬全哉陳君雨人旣刊行豫
河志矣復於從事防務之暇續爲蒐集編輯凡關於

豫河利弊上起往古下逮今茲史冊所及簡牘所傳
旁及一家之言沿革變遷工程緩急無不鉤深索隱
義蘊畢宣其有裨益於豫豈淺鮮哉近數年間河流
順軌民咸安居則陳君綢繆經營之成績亦胥於是
乎見之矣是爲序濟甯熊炳琦

豫河續志序

禹之治水行所無事九澤旣陂水由地中行所謂陂者卽今之隄障是也治河諸書多詳於南河豫河之有志所以別於南河而續志之編綜名實敘因革條理不紊利害綦詳誠盛舉也夫事固有當師諸古而亦有當酌於今者自導河積石因其性而通之緩其勢而束之紆延曲折以入於海近海之區宜於疏導內河諸地重在隄防經生論河多崇賈讓讓之策固有可取然厯代河徙已非故道河運旣改情形更殊

河之所經高者能刷卑者能淤漿陽迤東河勢驟闊
奔騰浩瀚難就範圍是以今之隄防重於往昔自磚
石諸壩創於昔賢後人因之歲有增益其間夷險變
化測驗勘估器具工程胥爲專家之學雖老於事者
難窺塗徑陳君雨人經營河防久著成績衡今酌古
續成是編蘊秘畢宣事實悉舉使佐之者有所循依
知其緩急則河流順軌豫境胥受其福矣是爲序濟

甯靳雲鶚

序

治河之書載籍極博自夏書平莫以後史冊所載專家所述無慮數十百種名言懋績多可取則而其要旨終不外順河之性而已河無百年不變之形隨其沿革變遷詳述防範疏濬之法使後人得以循其迹而因革焉此河渠諸書所以爲世珍也近代著述多成於銅瓦廂未決以前漕運未改故詳於南河而豫河獨畧今南河絕流旣久黃河自廣武以東不受兩岸山勢之夾束驟得平地奔騰肆縱治之不得其法

汜濫時虞固始吳君詠湘遂有豫河志之作信陽陳君雨人繼長河務既校而梓行之復賡續其事輯爲續志關於豫境河道特詳事實列爲多門無不綱舉目張有條不紊述往則銜接前志可以循迹規隨近事則終始相關易於究其原委工程經費悉爲條舉示人以共見之公技術名詞詳爲說明使人無探索之苦凡前志所未及悉補輯而無遺繼往開來允爲盛舉維峻兼長是邦得與陳君研求河策因地制宜疏濬防範水性得順居民乂安然則是志之編不惟

使後之覽者仰前賢摹畫之艱抑以知今日經營之
迹之有所自矣是爲序蒲城岳維峻

豫河續志序

豫河之有專書自豫河志始第其中詳案而畧事因
革之故經緯之端無可尋繹閱者憾焉余以十二年
十二月呈准編纂續志屬羅山王君榮搢主其事計
自癸亥冬著手再閱寒暑至乙丑秋告竣內分圖說
沿革職員公牘工料財政治績附錄八門都二十卷
綱舉目張原委畢具盡人閱之可以一目瞭然與前
志泰互考究豫河之要盡於此矣雖然是志之所詳
成法也已陳之迹也至臨工之計畫治事之精神則

不繫乎此循已陳之迹而規及久遠益求完備可也
執已陳之迹而沾沾以得尺得寸自喜不復研求窮
變通久之理則斷乎不可孟子曰禹之行水也行其
所無事也又曰禹之治水水之道也夫所謂無事所
謂水之道豈可專以迹求之哉苟明乎其故則是志
特糟粕焉耳何間世之足云顧余觀於今日之豫河
尚有數事不能不爲豫人告者隄防工程大抵臨河
急而背工緩自清嘉慶末武陟馬營壩工後河勢節
節南圜北岸由武滎以至陽封下北隄岸去河遠者

或十餘里多年背工大半荒廢彌望沙磧殆成陵谷
既無力大舉修復而歲修之款又經停止縱隊兵循
例工作而數十人累旬之畚鍤曾不敵汛期一朝
之風雨功不補患其何能給河勢變遷無常萬一大
溜北來突然出於所備之外何以禦之此可慮者一
也河之由銅瓦廂改道北徙也始於咸豐五年爾時
牽於蘇皖直東四省之爭議東南舊道迄未修築大
隄蘭考一帶串溝漫灘年年浸灌爲害於各莊村不
已因循七十年遂成懸案失此時而不一爲之所誠

恐涓涓不息終將有復歸舊道之一日近則禍及蘭
考睢寧遠則以蘇皖爲壑汜濫江淮矣此可慮者二
也豫河之無漫決大工南岸閱四十年北岸閱百餘
年痛苦旣亡恬嬉不免操計政者懲於前清河工款
項之糜濫銳加縮減改組以來確定預算實發者曾
不及五分之三河務人員厄於財力覆首則足露扶
東則西倒咄嗟補苴苟求無事歲歲貪天之功僥倖
於不可知之數雖可暫安終非長策夫黃河無百年
不變之形惜有限之小費而不顧無窮之大害非計